

आकाशवाणी जयपुर-अजमेर

- 18वीं लोकसभा रो पहलो सत्र नुवा चुणी ज्या सांसदां ने शपथ दिरावण सागे आज सरू व्हयो-प्रधानमंत्री नरेंद्र मोदी सब ऊं पैली सदन रा सदस्य रा तौर ऊं शपथ लीनी।
- प्रधानमंत्री कह्यो- वां री सरकार जनता री उम्मीदां पूरी करण सारू लगातार काम करेला।
- केंद्र सरकार थोक अर खुदरा कारोबारियां सारू गेंहू रा भंडारण री सीमा तैय कीनी।
अर
- राज्य मांय चौमासा ऊं पैली री बिरखा रो दौर जारी -आवता दो-तीन दिन मांय चौमासा री बिरखा सरू व्हेवण रा आसार।

18वीं लोकसभा रो पहलो सत्र आज नुवा चुणी ज्या सांसदां ने सदन रा सदस्य रा तौर ऊं शपथ दिरावण सागे सरू व्हयो। प्रोटेम स्पीकर भर्तृहरि महताब सब ऊं पैली सदन रा नेता प्रधानमंत्री नरेंद्र मोदी ने सदन रा सदस्य रा तौर ऊं शपथ दिरायी।

ई पाछे लोकसभा अध्यक्ष रा चुणाव ताई सदन री कार्यवाही चलावण मांय प्रोटेम स्पीकर महताब री मदद सारू बणायी ज्या अध्यक्ष पैनल ने शपथ दिरायी ज्यी। भाजपा रा सांसद राधा मोहन सिंह अर फग्गन सिंह कुलस्ते चेयरपर्सन पैनल रा सदस्य रा तौर ऊं शपथ लीनी, हालांकि, कांग्रेस रा सांसद के. सुरेश, डी.एम.के. रा सांसद टी. आर. बालू अर टी.एम.सी. रा सुदीप बंदोपाध्याय पैनल रा सदस्यां रा तौर ऊं शपथ नी लीनी। ई पाछे केंद्रीय मंत्री अमित शाह, राजनाथ सिंह, शिवराज सिंह चौहान, नितिन गडकरी, मनोहर लाल, पीयूष गोयल, जीतनराम मांझी, राजीव रंजन उर्फ लल्लन सिंह, डॉ. वीरेंद्र कुमार, किरेन रिजिजू, चिराग पासवान, गजेंद्र सिंह शेखावत, भूपेन्द्र यादव, अर्जुनराम मेघवाल अर भागीरथ चौधरी समेत न्यारा-न्यारा नेता लोकसभा सदस्य रा तौर ऊं शपथ लीनी। केंद्रीय मंत्री एच. डी. कुमारस्वामी अर प्रल्हाद जोशी कन्नड़ मांय, धर्मेंद्र प्रधान अर जुएल ओराम उडिया मांय, सर्बानंद सोनोवाल असमिया मांय अर के. राम मोहन नायडू अर जी किशन रेड्डी तेलुगु भाषा मांय शपथ लीनी। केन्द्रीय मंत्री सी आर पाटिल गुजराती मांय जद के प्रताप राव जाधव मराठी मांय अर डॉ. जितेन्द्र सिंह डोगरी भाषा मांय शपथ लीनी। केन्द्रीय मंत्री सुरेश गोपी मलयालम मांय, सुकांता मजमूदार बंगाली मांय अर दुर्गा दास उके संस्कृत मांय शपथ लीनी।

000

प्रधानमंत्री नरेंद्र मोदी कह्यो है के 18वीं लोकसभा रो सत्र विकसित भारत बणावण रा संकल्प सागे सरू व्हे रह्यो है। वे आज सत्र री सरूआत ऊं पैली संसद भवन सामी खबरनवीसां सागे बातचीत कर रह्या हा। प्रधानमंत्री कह्यो के वां रा राज मांय देश री जनता री उम्मीदां पूरी करण री लगातार कोशिश करी जावेला। प्रधानमंत्री कह्यो के सरकार चलावण सारू बहुमत री जरूरत व्हे है पण देश चलावण सारू सगळां री एक राय घणी खास व्हे है।

प्रधानमंत्री कह्यो के वां रा राज मांय सगळां ने सागे ले र अर संविधान री पवित्रता बणायी राखता थकां तेजी ऊं फैसला लेवण री कोशिश करी जावेला।

प्रधानमंत्री कह्यो के दुनिया री सब ऊं मोटी चुणाव प्रक्रिया शानदार तरीका ऊं पूरी व्ही है। वे कह्यो के आजादी पाछे देश री जनता महज दूजी दफा किण ई सरकार ने लगातार तीजी दफा सेवा रो मौको दीनो है। प्रधानमंत्री कह्यो के देश री जनता विपख ऊं उचित आचरण करण री

आस करे है। वे आस जतायी के विपख लोकतंत्र रो मान बणायो राखण सारू उम्मीदां माथे खरो उतरेला। 18 वे भरोसो जतायो के 18वीं लोकसभा रा सदस्य जनता री उम्मीदां पूरी करण री कोशिश करेला।

000

कांग्रेस पार्टी रा अध्यक्ष मल्लिकार्जुन खड़गे नीट परीक्षा, पश्चिम बंगाल मांय लारला दिनां व्ह्या रेल हादसा अर महंगाई रा मुद्दा माथे सरकार माथे चुप रेहवण रो आरोप माण्ड्यो है। संसद भवन सामी खबरनवीसां सागे बातचीत करता थकां आज पार्टी रा सांसद राहुल गांधी ई सरकार माथे संविधान ने कमजोर करण रो आरोप मांड्यो।

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारू श्रृंखला चलायी जा रही है। आज पेश है आं कानूनां मांय फरियादियां रा बारा मांय करी ज्या प्रावधानां री जाणकारी—

नुवा आपराधिक कानूनां मांय पीड़ित लोगां सारू मुफ्त ईलाज अर मुआवजा रा हक रो प्रावधान करी ज्यो है। नुवा प्रावधानां रे मुजब किण ई भांत रो नुकसाण व्हेवण या चोट लागण रा हालात मांय पीड़ित पक्ष मुआवजो लेवण रो हकदार व्हेला। पीड़ित लोगां ने बेगो मुआवजो दिरावण री निजर ऊं नुवा कानूनां मांय “पीड़ित” री परिभाषा मांय बदलाव करी ज्यो है। आं कानूनां रा तहत सगळा सरकारी अर गैर—सरकारी अस्पतालां सारू महिलावां अर बच्चां रे खिलाफ तेजाब ऊं हमलो करण सरीखा मामलां मांय मुफ्त ईलाज करणो तैय करी ज्यो है।

000

केंद्र सरकार खाण—पीण रा सामान री जमाखोरी अर सट्टेबाजी रोकण सारू थोक अर खुदरा कारोबारियां माथे गेंहू भेळो करण री सीमा तैय कर दीनी है। खाद्य अर सार्वजनिक वितरण सचिव संजीव चौपडा नई दिल्ली मांय आ जाणकारी दीनी। वे बतायो के कारोबारियां अर थोक मांय बेचण वाळां सारू तीन हजार टन री सीमा व्हेला जद के अर खुदरा दुकानदार सारू दस टन अर वां रा डिपो सारू तीन हजार टन री सीमा व्हेला। चौपडा कह्यो के आ सीमा 31 मार्च 2025 ताई लागू रहवेला। वे अखबारां मांय छपी देश मांय गेंहू रा भंडार री कमी री खबरां ने गलत बतायी।

000

राज्यपाल कलराज मिश्र राज्य मांय विद्यार्थियां ने एक दिन री मुफ्त प्राथमिक चिकित्सा री सिखावण देवण बाबत् कह्यो है। वे आज जयपुर रा राजभवन मांय रेडक्रॉस सोसायटी री राज्य स्तर री समीक्षा बैठक मांय बोल रह्या हा। चिकित्सा अर स्वास्थ्य विभाग, शिक्षा विभाग अर रेडक्रॉस सोसायटी मिल र ई बाबत् कार्यक्रम चलावेला। राज्यपाल प्रदेश रा 17 नुवा जिलां मांय ई रेडक्रॉस सोसायटी बणावण रा हुकम दीना। वे रेडक्रॉस रे जरिए अंगदान अर देहदान करण सारू लोगां ने प्रेरित करण माथे ई जोर दीनो। ई मौके चिकित्सा अर स्वास्थ्य मंत्री गजेंद्र सिंह खींवर कह्यो के स्वच्छता अभियान सागे पौधा रोपण, खूनदान, अंगदान अर देहदान ने बधावो देवण सारू रेडक्रॉस सागे मिल र कोशिशं करी जावेला।

000

उद्योग राज्य मंत्री के.के. विश्नोई री सदरत मांय आज सांचौर मांय जिला प्रशासन रा अहलकारां री मीटिंग राख्यी ज्यी। मीटिंग मांय मंत्री विश्नोई अहलकारां ऊं विकास रा कामां माथे निगराणी राख र बेगा पूरा करण सारू कह्यो। बूंदी मांय जिला कलेक्टर अक्षय गोदारा री सदरत मांय आज पाणी, बिजली अर मौसमी बीमारियां रा बारा मांय समीक्षा बैठक राख्यी ज्यी। कोटपूतली—बहरोड जिला मांय ई अतिरिक्त जिला कलेक्टर री सदरत मांय न्यारा—न्यारा अहलकारां री मीटिंग मांय जल जीवन मिशन रा तहत नल कनेक्शन रा काम मांय तेजी लावण रा हुकम दिया ज्यो।

000

बूंदी रो 782 वों स्थापना दिवस आज मनायो जा रह्यो है। ई मौके आज केई कार्यक्रम राख्यी ज्यो। म्हाणा खबरनवीस बतायो के स्थापना दिवस जळसा री सरूआत शहनाई बजावण सागे व्ही।

000

प्रदेश मांय आज व्ह्या दो न्यारा-न्यारा हादसां मांय तीन जणां री मौत व्हे ग्यी अर दो जणा जख्मी व्हे ग्या। सीकर ज़िला मांय रोल साहबसर कने ऊबा डम्पर मांय पिछाडी ऊं एक कार टकरा जावण रे कारण कार मांय सवार दो जणां री मौके ई मौत व्हे ग्यी जद के दो जणां जख्मी व्हे ग्या। बारां ज़िला रा खटका गांव मांय खेत मांय काम करती बगत बिजली रो करंट लाग जावण रे कारण एक जणा री मौत व्हे ग्यी।

000

बीकानेर ज़िला रा भीनासर मांय राजस्थान राज्य भारत स्काउट अर गाइड री ओर ऊं राख्थी ज्यो कौशल विकास प्रशिक्षण शिविर आज पूरो व्हे ग्यो। जळसा मांय न्यारा-न्यारा सांस्कृतिक कार्यक्रम पेश करी ज्या। 17 मई ऊं लगायी ज्या ई शिविर मांय ब्यूटी पार्लर, मेहंदी, सिलाई, कंप्यूटर, नृत्य, स्केटिंग, अंग्रेजी मांय बोलण अर चित्रकला समेत न्यारी-न्यारी सिखावण दीरीजी।

000

राज्य मांय चौमासा ऊं पैली री बिरखा व्हे रही है। लारला चौबीस घंटां मांय केई जिलां मांय तेज बायरो बाजण सागे बिरखा व्ही। आज ई अजमेर, दोसा, भरतपुर, धौलपुर, करौली, जोधपुर ग्रामीण, चूरु अर सवाईमाधोपुर जिलां मांय कठे-कठे तेज बायरा सागे हल्की तो कुछ ठौड़ां तेज बारिश व्ही। शाहपुरा ज़िला मांय ई छांटो-छिडको व्हेवण ऊं गर्मी ऊं थोडो आराम मिल्यो। दूजी कानी बीकानेर, बाड़मेर, जैसलमेर, बालोतरा, पाली अर झालावाड़ ज़िलां मांय तेज गर्मी अर उमस ऊं लोग परेशान रह्या। मौसम केन्द्र जयपुर आज जयपुर, कोटा, भरतपुर, अजमेर, उदयपुर, बीकानेर अर जोधपुर संभाग मांय बिरखा रा आसार जताया है। मौसम केन्द्र रे मुजब आवता दो-तीन दिन मांय प्रदेश मांय चौमासा री बिरखा सरू व्हेवण रा आसार है।

000

आईसीसी टी-ट्वेंटी विश्व कप क्रिकेट मांय आज भारत सुपर-8 रा मुकाबला मांय ऑस्ट्रेलिया रे खिलाफ खेलेला। ओ मैच रात आठ बज्यां सेंट लूसिया, ग्रॉस आइलेट रा डैरेन सैमी राष्ट्रीय क्रिकेट स्टेडियम मांय खेल्यो जावेला। भारत हाल ताई सुपर 8 रा दोन्यू मुकाबला जीत र वां रा गुप मांय अव्वल है, जद के ऑस्ट्रेलिया ने अफगानिस्तान रे खिलाफ हार रो सामनो करनो पड्यो हो।

000